

摘藻堂四庫全書薈要

集部

欽定四庫全書薈要

集部

御選宋詩卷七十一

詳校官原任主事<sub>臣</sub>李斯咏



欽定四庫全書薈要卷一萬八千三百七十八

集部

御選宋詩卷七十一

七言絕句八

王炎

出郊雜詠

閉戶不知春色嘉  
柳梢欲暗可藏鴉  
鴨頭新綠齊腰水  
女嬃輕紅刺眼花

道上東風掠面輕  
一犁雨足得新晴  
草頭蛺蝶自由舞

林下鷓鴣相對鳴

孤煙近見數椽屋急水時行獨木橋入眼異鄉風景別  
修簷一抹暮山遙

雲昏山色收圖畫雨過泉聲雜管絃馬上得晴春滿眼  
好花迎客亦嫣然

晚憩田家

家書未到鵲先喜春事無多鶯又啼偶對好山留客坐  
綠陰遮屋日將西

雙溪種花

雙溪漸有雜花開  
每日扶筇到一回  
勝似名園空鎖閉  
主人至老不歸來

戴敏

海上

萬頃鯨波朝日赤  
滄洲四望無窮極  
海山何處是蓬萊  
遍問漁翁都不識

陳造

早夏

安石榴花猩血鮮涼荷高葉碧田田  
鯢魚入市河豚罷已破江南打麥天

題趙秀才壁

日日危亭凭曲欄幾層蒼翠擁煙鬟  
連朝策馬衝雲去盡是亭中望處山

游隱靜往反

突兀南山萬仞青巖觀山頂白雲生  
今朝訪道五峰去

却向白雲生處行

煙樹雲生若有無  
行輿咿軋路盤紆  
小風弄雨晴還落  
身在龍眠水墨圖

游普向

青林果熟星宿爛  
修竹風來環珮鳴  
翠影扶疎僧宇靜  
吟餘屋角見雲生

日冒風埃髻脚黃  
歸懷絆驥可能忘  
誰知碧嶺蒼雲外  
占斷人間五月涼

早春十絕呈石湖 錄二首

條看媚白破梅枝更喜嬌黃著柳絲春事斬新當客眼  
何須山鳥報人知

樹外晴雲不礙飛東風無力怯單衣垂楊院宇斜陽裏  
還是鈎簾待燕歸

題項處士山堂

一菴小憩俗間勞月牖風軒俯鳥巢我亦青山倦遊者  
羨君先辦蓋頭茅



閒居

破曉東風尚作寒  
孤筇隨客已嬾  
姍絕知蚤起非吾事  
要趁梨花帶露看

次韻郭帥梅

客子徒煩賦憶梅  
怯寒未肯臘前開  
定知酒處頻回首  
有待江南信使來

題張省幹扇

前溪天濶淥泱泱  
溪上詩翁引興長  
安得南風吹小艇

吟看千蓋擁紅妝

泛湖

荷面跳珠小濺衣  
酒邊團扇已停揮  
濕雲收盡人間暑  
却度西山載雨歸

趙汝愚

題福州鼓山寺

幾年奔走厭塵埃  
此日登臨亦快哉  
江月不隨流水去  
天風常送海濤來

致爽軒

濃陰夾道水流渠  
吹盡殘花不復餘  
惟有范家三畝竹  
青青依舊色侵書

姜特立

初夏

催成新夏荷浮翠  
送盡餘春柳褪絲  
正是清和好時節  
嫩柯嬌葉媚晴天

柳

長條攀折歎離披  
底事人間管別離  
何事龍津通御氣  
建章宮裏鬪腰支

翠螺

繞旋曾不費躋攀  
累土為基聳翠鬟  
恰似洞庭湖上望  
爛銀盤裏對君山

人送雙雁

卑棲籠檻尚成雙  
莫歎彫零未著行  
猶勝孤飛千萬里  
洞庭波上冷吳霜

煩劉公達甃園中小池以詩謝之

感君巧思葺方塘石甃無痕細著行更擬中間添小嶼  
藕花深處宿鴛鴦

庭草

一簇牆陰綠正繁不依朱戶傍雕闌竹光苔色深相映  
只許閒人靜處看

和潘倅新溪

山色湖光相接連千章古木老雲煙晚來曲港回舟處

如在孤山柳嶼邊

平湖潋灩帶垂楊綠暗長堤五月涼彩女移舟蓮浦去  
棹歌聲裏水風香

寄邦佐弟歸鄉

馮公嶺上翠摩空下視羣山千萬重想得行人歸意速  
又穿雲樹過前峰

陳傅良

晚春

千枝寂寞待春風  
風雨淒淒春已空  
未曉啼鶯相喚語  
海棠飛盡一庭紅

海棠

淡月看花似霧中  
遽呼燈燭倚花叢  
夜來月色明如晝  
却向庭蕪數落紅

姜夔

過湘陰寄千巖

渺渺臨風思美人  
荻花楓葉帶離聲  
夜深吹笛移船去

三十六灣秋月明

雁圖

萬里晴沙夕照西  
此心惟有斷雲知  
年年數盡秋風字  
想見江南搖落時

除夜自石湖歸苕溪

細草穿沙雪半消  
吳宮煙冷水迢迢  
梅花竹裏無人見  
一夜吹香過石橋

黃帽傳呼睡不成  
掇篙細細擊流冰  
分明舊泊江南岸



舟尾春風颭客燈

笠澤茫茫雁影微  
玉峰重疊護雲衣  
長橋寂寞春深夜  
只有詩人一舸歸

次石湖書扇韻

橋西一曲水通邨  
岸閣浮萍綠有痕  
家住石湖人不到  
藕花多處別開門

湖上寓居雜詠

花牆曲曲柳冥冥  
人靜山空見一燈  
荷葉似雲香不斷

小船搖曳入西陵

指點移舟著柳堤  
美人相顧復相攜  
上橋更覺秋香重  
花在西陵小苑西

過垂虹

自作新詞韻最嬌  
小紅低唱我吹簫  
曲終過盡松陵路  
回首煙波十里橋

訪費山人

稻叢茁茁欲齊肩  
楊柳僛僛不蔽蟬  
忽憶石頭橋下路

槿花斜壓釣魚船

雪中

黃鶴磯邊晚渡時  
柳花風急片帆飛  
一聲長笛魚龍舞  
白浪如山不肯歸

萬里行空轉屋簷  
高寒屢索酒杯添  
故人家住吳山上  
借得西湖自捲簾

越中士女春遊

秦山越樹兩依依  
閒倚闌干看落暉  
楊柳梢頭春又暗

玉簫聲裏夜遊歸

送范仲訥往合肥

我家曾住石闌橋鄰里相過不寂寥君若到時秋已半  
西風門巷柳蕭蕭

小簾燈火屢題詩回首青山失後期未老劉郎定重到  
煩君說與故人知

蕭山

歸心已逐晚雲輕又見越中長短亭十里水邊山下路

桃花無數麥青青

釣雪亭

聞干風冷雪漫漫惆悵無人把釣竿  
時有官船橋畔過白鷗飛去落前灘

燈詩

南陌東城盡舞兒畫金刺繡滿羅衣  
也知愛惜春遊夜舞落銀蟾不肯歸

遊人歸後天街靜坊陌人家未閉門  
簾裏垂燈照樽俎

坐中嬉笑覺春溫

琵琶洲

松尾颼颼石浪寒  
寒吟蕃曲轉聲酸  
人間無此春風手  
應是江妃夜夜彈

劉翰

漁父

輕舟一葉一輕蓬  
上有蕭蕭鶴髮翁  
昨夜不知何處宿  
月明都在笛聲中

上元小亭

靖康詔令文章種桐邑公侯國老家種得人間桃李滿  
春風無地不開花

石頭城

離離芳草滿吳宮綠到臺城舊苑東一夜空江煙水冷  
石頭明月雁聲中

客去

送客歸來月滿檐梅花微笑隔疎簾酒醒今夜銀屏冷

沈水薰爐旋旋添

聞笛

誰家玉笛按梁州  
吹徹春風不下樓  
若道聲聲都是恨  
不知消得幾多愁

小亭

芳草萋萋怨未歸  
西池殘夢要題詩  
綠窗昨夜東風小  
開遍梅花第幾枝

題飛雲閣



一笑歸來春尚寒  
小梅飄盡雪初殘  
遲遲更待梨花月  
醉倚飛雲十二闌

立秋日

亂鴉啼散玉屏空  
一枕新涼一扇風  
睡起秋聲無覓處  
滿階梧葉月明中

張良臣

曉行

千山萬山星斗落  
一聲兩聲鐘磬清  
路入小橋和夢過

豆花深處草蟲鳴

西湖晚歸

帖帖平湖印晚天  
踏歌遊女錦相牽  
鳳城半掩人爭路  
猶有胡琴落後船

送人遊姑蘇

兒時吾亦寄君州  
細細聽君說舊遊  
處處綠波通酒巷  
女郎多在採菱舟

九日書呂季慈室

上池入寺見承平  
影落南州迹易陳  
手把黃花看新雁  
風煙愁殺舊京人

偶題

誰家池館靜蕭蕭  
斜倚朱門不敢敲  
一段好春藏不盡  
粉牆斜露杏花梢

黃幹

甲子語溪閑雨二首

塘中龍骨高數層  
龜坼田中縱復橫  
青裙箬笠倚車卧

但有空車無水聲

牛女盈盈河漢傍  
清風肅肅吹羅裳  
朱門達旦聽歌曲  
莫遣濃陰蔽夜光

詹初

春歸

生意無端綠滿枝  
閉門高卧日遲遲  
一編周易年年把  
門外春歸總不知

林亦之

題嚴子陵釣臺

莫向金門傲冕旒歸來却要著羊裘乾坤不是劉文叔  
那得長竿到白頭

重陽次日登城山

城山登罷冷侵衣湖上重來月滿巵未愛疎籬黃菊日  
最憐秋水白雲時

九日下水口

菊花時候苦思鄉急水還家一日強不道南風打頭上

客船搖櫓作重陽

陳藻

過新喻

四顧茫茫水接天  
遠山如卧白雲邊  
馬頭忽看孤峰起  
錯喜鄉關是目前

春日

獨上譙樓日一迴  
春風桃李滿城開  
狂夫欲語無人聽  
呼取閒雲共酒杯

過象州

都無一物作生涯  
坊巷蕭條有幾家  
料得寒梅應悵恨  
滿城開作寂寥花

趙民則

題張家店壁

舍策投牀睡便濃  
覺來涼葉動西風  
驚秋念遠無窮意  
客裏知誰此夜同

虞傳

和姜梅山

當年寶婺我為州錦里先生得唱酬  
一自江頭分袂後至今空想暮雲愁

州縣豐登公事少凝香燕寢只吟哦  
樂天長短三千首爭似斯民擊壤歌

胡澄

和葉樞相芍藥詩

鶉鴒一聲春已歸蝶蜂無計戀花時  
筆頭挽得春光住



却是先生芍藥詩

樓鑰

從子滌濯寒納涼

楊柳陰陰映粉牆  
密雲藏雨晚來涼  
高荷欲出闌干上  
笑挹江湖吸淨香

謝潘端叔惠紅梅

并序

潘端叔惠紅梅一本全體皆江梅也香亦如之但  
色紅耳來自湖湘非他種比自此當為紅江梅以

別之王文公蘇文忠石曼卿諸公有紅梅詩意其  
皆未見此種也感歎不足為賦二十絕

錄八首

舊家桃李種河陽今日紅梅自楚湘根撥送春君意重  
為移絕豔到吾鄉

黃姑曾為點冰肌亦有緇塵染素衣何似胭脂天賜與  
暗香猶在是邪非

為君手種向南窗誤認昌州移海棠元是玉妃生酒暈  
帳中仍帶返魂香

殿後鞞紅色漫濃絳紅空自笑春風何人擊碎珊瑚樹  
惱得嬌妃面發紅

舊見寒花蠟蒂紅寧知沁入雪膚中絕憐金谷佳人隋  
到地餘香散曉風

梅花幾種盡相聞老矣才欣見此君相與對花文字飲  
絕勝歌舞醉紅裙

縞巾練帨玉為肌誰點微頰向北枝若使羅虬見顏色  
定須將此比紅兒

只說梅花似雪飛  
朱顏誰信暗香隨  
不須添上徐熙畫  
付與西湖別賦詩

從子澗送梅枝戲作

向來地暖見東家  
帶葉江梅殿歲華  
不似青春三月暮  
南枝梅子北枝花

菁江送客

菁江十里路透遲  
兩岸平疇接翠微  
贏得閒中乘畫舫  
隨潮西上趁潮歸

過從子澤家

楚楚初篁脫綠苞  
城居約畧似荒郊  
土膏更得春風力  
直引薔薇上竹梢

龍潭方丈

又因寒食此中來  
窗戶虛明絕點埃  
山裏春風無間斷  
海棠開過棣棠開

小酌元衛弟聽雨

小閣臨流暑氣清  
藕花的的照人明  
移床更近闌邊坐

要聽碁聲雜雨聲

楊花

雨壓輕寒春較遲  
春深不見柳絲飛  
忽然飛入閒庭院  
疑是故人何處歸

省宿

樹滿茅山綠正肥  
昏鴉日日向南歸  
如今身在三茅外  
却看歸鴉正北飛

葉適

贈通川詩僧肇書記

海濶淮深萬里通  
吟情浩蕩逐春風  
却尋斗水龍湫住  
裁剪雲煙字字工

送王道夫舟中韻

鸚鵡收聲避鷓鴣  
田家蠶麥已知秋  
西湖風物無人共  
時有跳魚入過舟

橘枝詞記永嘉風土

蜜滿房中金作皮  
人家短日挂疎籬  
判霜剪露裝船去

不唱楊枝唱橘枝

高似孫

聚景園

翠華不向苑中來可是年年惜露臺  
水際春風寒漠漠  
官梅却作野梅開

石楠

自隨野意了山行香浸楠花白水生  
借得風來帆便飽  
隔溪新度一聲鶯



梅

舍南舍北雪猶存  
山外斜陽不到門  
一夜冷香清入夢  
野梅千樹月明邨

危稹

春日有感

春日長安百萬家  
湖邊無日不香車  
一株柳色吾無分  
看殺庭前薺菜花

情知老却流鶯了  
爭奈狂如蛺蝶何  
尚有紫薇紅藥在

佳人休唱怨春歌

春日即事

麥風翻隴潑濃綠  
花露滴枝黏老紅  
小立樓頭檢春事  
一絲暖日墜青蟲

表萬頃

次洪內相十月桃韻

千紅萬蕊彫零盡  
安得枝頭數點紅  
疑是神人寫春色  
鎮長留影在屏風

舊日驪山宮殿中  
玉妃無數舞衫紅  
只應歸去蓬萊後  
夢作寒花笑北風

次余仲庸松風閣韻

飛來數點雨初歇  
啼鳥一聲春正長  
讀罷黃庭了無事  
旋安銀葉試爐香

古木陰陰六月涼  
幽花寂寂四時香  
絲桐清夜作三弄  
明月入簾風拂牀

恰到梅邊春意萌  
困人天氣又清明  
爐熏茗椀北窗下

卧聽鶯蠻黃鳥聲

已著遺經洗此心更尋流水濯吾襟  
經旬不涉溪邊路  
行帶苔錢如許深

日出

日出柴門尚嬾開綠陰多處且徘徊  
槐花滿地無人掃  
半在牆根印紫苔

早作

井梧飛葉送秋聲籬菊緘香待晚晴  
斗柄橫斜河欲沒

數山青處亂鴉鳴

北窗清冷不成眠  
風遞蛩聲到枕邊  
試喚兒童捲疎箔  
一簾花影月娟娟

秋

數聲牧笛日將晚  
一曲樵歌山更幽  
解帶盤桓小溪上  
坐看紅葉汎清流

雪中再示德齡二弟

青青窗外幾修篁  
也學宮梅巧樣妝  
說與惠連須著句

雪邊春色到池塘

別曹教授

從渠柳色自青青莫為行人賦渭城只恐南牆舊時竹  
誤隨風雨作離聲

江花岸柳太多情長逐春風管送迎我亦思歸歸未得  
夜窗愁聽杜鵑聲

高安別蘇野塘

交蓋纔傾便語離絕憐立馬看君時梅花未必堪相寄

待倩郵筒寄小詩

題希亮畫

晚牧歸來月在山夜深茅屋不勝寒  
棲鳥欲動催翁起快傍煙汀把釣竿

題箋

六七葉蘆秋雨裏兩三箇雁夕陽邊  
青天萬里渾無礙衝破寒潭一抹煙

簡瑄上人

千里歸來覓故林  
朱絃雖在少知音  
春風玉几山前路  
忍負平生一片心

劉宰

過剡溪

青山疊疊水潺潺  
路轉峰回又一灣  
想見雪天無限好  
不妨獨棹酒船邊

題馮公嶺

層樓傑閣聳朱闌  
樓下行人自往還  
但見彩雲橫木末



不知身在翠微間

舟過惠山

小立船頭看惠山  
山尖半在有無間  
蠶眠未老秧方綠  
且放煙雲自往還

舟中

蓼岸著花紅半吐  
稻畦雨過綠平鋪  
炊煙起處三家市  
却向江湖憶畫圖

秋懷

一抹紅綃日脚霞  
千林暮靄納歸鴉  
西風捲盡梧桐葉  
乞與中庭散月華

雲邊阻雨

輾轉無眠到夜闌  
鵲聲送喜近簷間  
好風吹斷夜來雨  
晴日放開雲外山

又用前韻

薔薇籬落送春闌  
筍蕈園林早夏間  
牛背牧兒酣午夢  
不知風雨過前山

劉過

呈王山父

疎煙淡淡樹重重  
畧得西南有路通  
鐘板不鳴山寺靜  
閉門人在月明中

越州能仁寺壁

流年轉眼一飛梭  
如此頭顱奈老何  
狼籍落花春不管  
竹雞啼處雨聲多

西湖

西湖湖上山如畫二十年前魯客來飛絮滿城歸未得  
江南老却賀方回

弋陽渡頭

車聲盡日滑黃泥怕聽空桑叫竹雞風雨不知春早晚  
柳條拖綠半江低

自宣溪過早禾渡

雨後斜陽未見晴曉看紅日報窗明筍輿十里宣溪路  
剡地濃雲脚裏行

梅到攬春菊送秋早  
未渡口晚煙收風從灘上催船過  
滾起寒沙一併流

邨店

林深路轉午雞啼  
知有人家住隔溪  
一鳥鬧紅春欲動  
酒帘正在杏花西

春歸

百花開盡到酴醾  
一片春心又欲歸  
可恨東風留不得  
謾教啼鳥怨斜暉

雁

朝隨漢使到天涯  
暮與江鷗宿浦沙  
歲晚客途容一飽  
稻粱多處即為家

聽阮

縫蠟攢花夜氣橫  
尊前更著許風情  
却將江上風濤手  
來聽紗窗摘阮聲

閒步

山徑無人鳥篆沙  
杖藜閒看摘新茶  
錦綉委地筍翻籜

黃玉滿林松帶花

呂聲之

紫霄亭二首

半空煙雨有無間  
碧玉屏開四面山  
我欲紫霄亭上望  
吹笙人去幾時還

未把浮漚閱世間  
蓬萊一水隔三山  
試窮千里登臨目  
望斷青山白鳥還

丹丘道中

夜宿溪頭十里邨數星漁火照籬門雁山峭絕經行處  
猶帶煙霞入夢魂

高孝璫

題臨安西湖

朱簾白舫亂湖光隔岸龍舟艤夕陽今日歡遊復明日  
便將京洛看錢塘

汪莘

秋懷



四野秋風交敝廬時平不用藺相如有人來問生涯事  
指點蓑衣學釣魚

次潘別駕韻

野店溪橋柳色新千愁萬恨為何人殷勤織就黃金縷  
帶雨籠煙過一春

謁真直院楊花滿路口占一絕見直院誦之

三月天寒尚臘衣錢塘遊子歎斜暉柳間蘇小無由見  
惹得楊花滿袖歸

三月十九日過松江

薰風吹夢聽新蟬  
又向長橋艤釣船  
好剪吳松半江水  
袖歸三十六峰前

笠澤滄波擁洞庭  
望中七十二峰青  
待偕龍女乘雲去  
占取參天一畫屏

回至松江

欲向江南採白蘋  
杜鵑啼後已無春  
洞庭龍女雲中降  
手把雙珠笑贈人

深林茅屋隱漁樵時有扁舟過石橋誰把客星入圖畫  
曉風殘月伴吹簫

夏日西湖閒居

十里湖光若見招柳堤荷蕩赤闌橋待他朝市人歸後  
獨汎扁舟吹玉簫

急管繁絃樽俎間何人靜眼對湖山怪來水面無鷗鷺  
多在殘蒲落照灣

晚風吹動碧琳寒初日花房露未乾誰道幽人無伴侶

紅蕖萬朵竹千竿

醉把青荷當甯笠亂披紅艾作蓑衣  
漁翁家在蓬瀛上  
欲駕蓮舟一葉歸

春夏之交風雨彌旬耳目所觸卽事

石橋南北碧桃香翠葉交柯水面涼  
終歲方壺無一事  
春來也為種花忙

不賦杜鵑三十秋今愁不比昔時愁  
杜鵑豈足催春去  
為見春來啼不休

野水平橋細浪生柴門草長斷人行園林霽後春如在  
燕雀鳴時夏正清

雷電陰晴共一簾殘春首夏境相兼閒尋穉筍今朝長  
靜數新荷昨夜添

贈張漢卿

相伴留侯訪赤松碧桃花下醉溶溶玉龍嘶罷還家晚  
月到蓬萊第一峰

籬陰

籬陰雙蝶趁春暉輕展新黃試舞衣點草撲花如得意  
因何相逐背人飛

感秋

閒佩仙瓢到柳汀柳邊一點酒旗星斜陽欲落無人惜  
空有煙林作畫屏

天文柳星邊  
有酒旗星

陳淳

題江郎廟

三石參天作柱擎自從開闢便崢嶸何為末俗好奇怪

盡道江郎魄化成

李璧

龍鵠山房

蕭條白日閉巖扃  
留作遊人萬古情  
猶有山中舊時鹿  
舉頭如聽讀書聲

杜旂

上徐子宜侍郎

貽辭將軍戰不休  
當時部曲亦封侯  
夜涼忽夢燕山月

猶幸君恩晚見收

岳珂

至鄂期年以饒事不給於詩乙亥夏五廿有八  
日始解維雪錦夜宿興唐寺繁星滿天四鼓遂  
行日初上已抵許黃州幾百里矣午後南風薄  
岸舟屹不能移延緣葭葦間至暮不得去始作  
紀事十解呈舊幕諸公

錄六首

雪錦亭前水接天晚波如縠放歸船新詩開務從今日



此是江行第一篇

離歌已盡沙頭玉夕照初翻浪底金自是晴鷗無六月  
半江雪片湧波心

蕭蕭衰髮倚西風兩岸青山盡識儂東去西來緣底事  
祇應添得一龍鍾

葭葦延緣舞翠旌白頭吹浪又相迎攀轅亦作留行計  
莫道馮夷不世情

赤壁江頭白羽揮鰕肥西塞酒同攜歸期應在初弦月

家住康山西復西

人生邂逅適相歡一曲高歌行路難  
頻寄詩筒君勿厭種花持釣是閒官

後江行

日日征帆上水風掀天雪浪駭魚龍  
不須檢校江行厯知過雲山幾萬重

遠邨煙暝牛羊下近岸澄波鷗鷺閒  
一抹斜陽江似鏡天移小景向人間

西望沙羨東秣陵湓江中道是歸程柳陰繫纜人歸後  
頻有黃鸝三四聲

九月八日桐川道中二絕

斷雲輕素抹山腰山下人家野水橋小隊旌旗空獵獵  
不教閒趁酒旗招

依稀九日明朝是三徑情知不到家隨分秋光關節物  
桐川道上看黃花

劉仙倫

盱江道中

過雨青山啼杜鵑  
池塘水滿柳飛緜  
田家正好忙時節  
女採桑歸男下田

程秘

早入

紫薇浥露翠條深  
捷捷靈鳥振好音  
全是冰巖亭上坐  
四屏煙靄奏春禽

閏九十四

午夜青衣海上還八年兩度雪漫漫如今一水平如鏡  
好釣桐江五百灘

出南郊清甚

春風吹屐到南園著酒塗酥花正繁更喜滿前無俗物  
橫塘疎竹渭南邨

盧祖皋

玉堂有感

兩山風雨故留寒九陌香泥苦未乾開到海棠春爛漫

檐頭時得數枝看

松江別詩

明月垂虹幾度秋  
短篷長是繫人愁  
暮煙疎雨分攜地  
更上松江百尺樓

教陶孫

蘆雁

莫話淒涼塞北秋  
銜蘆避弋使人愁  
與君細展江南畫  
水宿沙眠得自由

趙師秀

玉清夜歸

巖前未有桂花開  
觀裡閒尋道士來  
微雨過時松路黑  
野螢飛出照青苔

池上

朝來行藥向秋池  
池上秋深病不知  
一樹木犀供夜雨  
清香移在菊花枝

白石巖

誰炷清香禮少君  
數聲金磬夢中聞  
起來閒把青衣袖  
裏得闌干一片雲

約客

黃梅時節家家雨  
青草池塘處處蛙  
有約不來過夜半  
閒敲碁子落燈花

數日

數日秋風欺病夫  
盡吹黃葉下庭蕪  
林疎放得遙山出  
又被雲遮一半無



題四聖觀道士詩卷

一觀桃花紅似錦  
兩堤楊柳綠於雲  
遊人只是遊晴晝  
煙雨朝昏盡屬君

翁卷

西風

一處西風一處愁  
又逢鳴雁在滄洲  
芙蓉不分秋蕭索  
鬪折繁紅滿樹頭

雁池作

包家門外柳垂垂  
搖蕩春風滿雁池  
為是城中最佳處  
每經過此立多時

舍外早梅

行過江邨未有梅  
一花忽向暖枝開  
黃蜂何處知消息  
便解尋春隔舍來

東湖行

湖水新添宿雨晴  
野禽無處不春聲  
萬株楊柳青如昨  
全是東風染得成

觀落花

纔看艷蕾破春晴  
又見飛花點點輕  
縱是閒花自開落  
東風畢竟亦無情

寄張季思

荆吳中隔萬山遙  
那得相逢話寂寥  
長憶梅花好時節  
訪君船泊古楓橋

鄉邨四月

綠遍山原白滿川  
子規聲裏雨如煙  
鄉邨四月間人少

纔了蠶桑又插田

還家夜同趙端行分韻

莫怪繁霜滿鬢侵  
半年長路幾關心  
還家檢點家中物  
依舊清風在竹林

野望

一天秋色冷晴灣  
無數峰巒遠近間  
閒上山來看野水  
忽然水底見青山

徐照

題趙運管吟篷

飛塵難到碧波中  
波上煙雲盡不同  
吟斷不知驚鷺起  
汀花一半落窗篷

舟上

小船停槳逐潮還  
四五人家住一灣  
貪看曉光侵月色  
不知雲氣失前山

題張提舉西野

渡頭風景如前日  
誰種桃花在水邊  
未晚人家門戶閉

鷺鷥閒立釣魚船

寄家書作

屋頭桑葉大如錢  
知是吳蠶第一眠  
遠水忽來瀟岸沒  
家書却寄道州船

徐璣

夜涼

夜涼扶杖出山齋  
身似孤雲倚石崖  
吟就不知山月曉  
清風滿面落松釵

春雨

斷橋橫落淺沙邊  
沙岸疎梅卧曉煙  
新雨漲溪三尺水  
漁翁來覓渡船錢

柳著輕黃欲染衣  
汀沙漠漠草菲菲  
晚風吹斷寒煙碧  
無數鴛鴦溪上飛

夏日閒坐

無數山蟬噪夕陽  
高峰影裏坐陰涼  
石邊偶看清泉滴  
風過微聞松葉香

移官南浦作

簿領初為建水栖  
移官南浦又沈迷  
溪山轉處人烟隔  
惟有黃鸝一樣啼

秋行二首

戛戛秋蟬響似箏  
聽船閒傍柳邊行  
小溪清水平如鏡  
一葉飛來細浪生

紅葉枯梨一兩株  
脩然秋思滿山居  
詩懷自歎多塵土  
不似秋來木葉稀



新涼

水滿田疇稻葉齊日光穿樹曉煙低黃鶯也愛新涼好  
飛過青山影裏啼

春晚

午風庭院綠成衣春色方濃又欲歸  
蝌蚪散邊荷葉出  
餘醺香裏柳絲飛

漳州圓山

輕煙漠漠霧緜緜野色籠青傍屋前  
盡說漳南風景好

衆山圍繞一山圓

新秋

新秋一雨洗林闌  
晚色清澄滿望間  
風靜白雲橫不斷  
山前又疊一重山

秀峰寺

籃輿晚泊近巖隈  
精舍門臨古道開  
僧子相逢便相識  
十年三過秀峰來

過九嶺

斷崖橫路水潺潺行到山根又上山  
眼看別峰雲霧起不知身已在雲間

連山官湖

衆山圍繞淥團圓官木參差古道邊  
行盡濃陰今不了 一湖飛雨帶輕煙

丹青閣


翠靄空霏忽有無筆端誰著此工夫  
溪山本被人圖畫却道溪山是畫圖

御選宋詩卷七十一

謹案第三十七頁前四行寄張季思刊本寄訛季

據葦碧軒詩集改





總校官庶吉士臣侍朝

校對官檢討臣蕭九成

謄錄舉人臣張昱

欽定四庫全書薈要

集部

御選宋詩卷七十二

詳校官原任主事

臣李斯咏



欽定四庫全書薈要卷一萬八千三百七十九

集部

御選宋詩卷七十二

七言絕句九

薛師石

題南塘薛圃

門對南塘水亂流  
竹根橘柢自成洲  
中間老子隱名姓  
只聽漁歌今白頭

孤山

不到西湖今幾時十年霜鬢欲如絲難尋和靖題詩處  
空見梅花成老枝

送薛泳

病裏風光總虛擲岸花園柳雨中休無端好客隨春去  
送酒吟詩一併愁

周文璞

出白下

南朝禁籞夕陽明猶與遊人作隊行煙滿天淵池上路

菜花黃盡綠陰成

攜李道中

吹徹鶯笙醉碧桃  
古城斜日泛輕舸  
此行憶著經行處  
綠樹黃桑一樣高

卧龍山下聽吟松  
細雨清明似夢中  
柳陰朱闌三百尺  
渴鳥猶自泣春風

鳳門泉

石根兩眼北流泉  
乳竇潛通御井邊  
漂出宮花人不識

又沿衰草下山前

寄山中道友

憶得尋山復出山  
綠楊時候暮春間  
至今只有遊仙夢  
長與松風自往還

高翥

西湖

淺水搖船冷夏沙  
平林暝色接棲鴉  
湖邊老樹垂垂白  
半是梅花半雪花

送別

老去情懷怕別離  
年來不作送行詩  
人前舉似終難信  
問著垂楊便可知

春日北上二首

人緣白石溯清溪  
手剝蒼苔認舊題  
春色滿山歸不去  
刺桐花裏畫眉啼

插花吹笛兩山中  
桃李尊前日日同  
待得馬頭飛絮滿  
更來沽酒看殘紅

秋日

庭草銜秋自短長  
悲蛩傳響答寒螿  
豆花似解通鄰好  
引蔓殷勤遠過牆

獨客飄然物外遊  
江南江北總宜秋  
芭蕉昨夜緣何事  
和雨和風作許愁

秋興

數聲新雁夜初長  
曉起開門衣袂涼  
籬菊褪黃秋興嬾  
瓦溝才試一痕霜

秋晚即事

江頭楓葉舞低回  
催得濃雲頃刻開  
萬里碧天紅日晚  
數聲新雁送寒來

秋山散步

乍晴沙路軟於塵  
新著芒鞋更可人  
誰道秋山不宜路  
桂花多處勝行春

江居晚詠

家住清江江上邨  
江雲山影自平分  
幾回起早開門看

不見青山見白雲

春寒

料峭東風破客衣  
春寒不比臘前時  
纔憐牆角櫻桃樹  
全似梅花雪後枝

春情

天涯海角水雲寬  
人在吳頭楚尾看  
彈徹箏篴難寄恨  
海棠庭院獨凭闌

晚春即事



輕煙終日鎖樓臺  
細雨絲絲半濕苔  
杜宇一聲清嶂外  
谿流時送落花來

冬日即事

江上凝冰約水痕  
門前殘雪綴溪雲  
杖藜獨立梅梢月  
成就清寒到十分

訪鈺樸翁不遇

亂花飛絮趁長髯  
來訪西湖竹裏菴  
行盡白雲三十里  
詩人又在白雲南

西湖春雪

小艇沿河看雪飛，正當騎馬踏春時。  
是誰乞與楊花舞，先占東風一月期。

過臨平

江風一似白鷗輕，起揭船篷看曉晴。  
梅子著花霜壓岸，自披風帽過臨平。

山行即事

落盡桐花春已休，過牆新竹籜初抽。  
山行步步黃泥滑，

小立溪橋聽雨鳩

下塘

日出移船日又斜  
蘆根時復見人家  
水鄉占得秋多少  
岸岸紅雲是蓼花

春日雜興

欄鈴奏曲響珊珊  
盡日重門不啓闌  
多插瓶花供宴坐  
為渠消受一春閒

雨中

濃雲漠漠雨飛飛不放東風取次吹  
先自一春晴意少  
那看梅子欲黃時

山堂即事

杜鵑聲裏桐花落  
山館無人晝掩扃  
老去未能忘結習  
自調濃墨寫黃庭

釣灘懷古

松澤亭前山色幽  
洙涇渡口荻花秋  
離釣三寸無人會  
一棹東西獨未休

野水間雲無定蹤一生空棹月明中  
錦鱗纔得翻船去堪笑家風徹底窮

葛天民

江山

連天芳草雨漫漫贏得鷗邊野水寬  
花欲盡時風撲起柳絲無力護春寒

即事用天竺韻

寒食少逢天氣嘉十朝九日雨如麻  
新巢惟有燕生子

小巷已無人賣花

正月二日

小巷春陰獨掩扉  
峭寒著盡過冬衣  
老來情緒無多子  
禁得梅花似雪飛

清明日訪白石不值

花薺懸燈柳插簷  
老懷都得似餽甜  
畫船已載先生去  
燕子無人自入簾

送劉僧善行

西望羣山碧入吳故人一笠片雲俱東風不斷邨邨柳  
展盡陽關送客圖

絕句

雨脚初收起暮煙芒鞋竹杖翠雲邊東風解發陽春意  
放出落花啼鳥天

行春詞

終日尋春入醉鄉不知何處見春光風條舞綠水楊柳  
雨點飛紅山海棠

正是風嬌日暖天  
薔薇粉褪海棠鶯  
貴人那得看花福  
多在綠窗猶醉眠

寶馬香車正踏青  
豈知已是過清明  
燕雛告訴花都落  
鳩婦丁寧雨速晴

曉巡北圃

池邊弄水手猶冰  
藕臂風寒更粟生  
柳葉春深槐葉茂  
桃花夜暗李花明

同鄧孤舟林片月二友曉吟



君非愛此數峰青肯戀扁舟入蓼汀羣雁橫空成一字  
孤螢渡水似雙星

葉紹翁

西湖秋晚

愛山不買城中地畏客長撐屋後船荷葉無多秋事晚  
又同鷗鷺過殘年

遊園不值

應嫌屐齒印蒼苔十叩柴門九不開春色滿園關不住

一枝紅杏出牆來

仙興

金書宮殿玉闌干  
雪瀑泉飛洞口寒  
日暮仙翁騎鶴去  
碧桃花滿石碁盤

出北關二里

脫衣命僕洗塵埃  
籬落人家未見梅  
出得城門能幾步  
船頭便有白鷗來

野蝶

銀為鬚翅粉為肌驅役東風不解肥桃李上林無分到  
可憐却傍菜花飛

嘉興界

平野無山見盡天九分蘆葦一分煙悠悠綠水分支港  
撐出南鄰放鴨船

煙邨

隱隱煙邨聞犬吠欲尋尋不見人家只於橋斷溪迴處  
流出碧桃三數花

九日呈真直院

秋風吹客客思家破帽從渠自在斜腸斷故山歸未得  
借人籬落種黃花

田家三咏

織籬為界編紅槿排石成橋接斷塍野老生涯差省事  
一間茆屋兩池菱

田因水壞秧重插家為蠶忙戶緊關黃犢歸來莎草濶  
綠桑採盡竹梯間

抱兒更送山中飯，畫髯濃調竈額煙。  
爭信春風紅袖女，綠楊庭院正秋千。

訪龍井山中村友

雨打荒籬豆莢垂，柴門未啓立多時。  
客來自掘蹲鴟煮，旋拾枯松三數枝。

西溪

一條橫木過前溪，邨女齊登採葉梯。  
獨立衡門春雨細，白鷄飛上樹梢啼。

贈陳宗之

官河深水綠悠悠  
門外梧桐數葉秋  
中有武林陳學士  
吟詩消遣一生愁

夜書所見

蕭蕭梧葉送寒聲  
江上秋風動客情  
知有兒童挑促織  
夜深籬落一燈明

寄趙省翁二首

兩度馳書未報音  
溫陵尺紙定千金  
多應驛使曾相訪

短艇煙波無處尋

君王未肯賜西湖  
鷺鷥叢中借地居  
憔悴風姿今釣叟  
癡心猶望故人書

鷺

無事時來立封田  
幾回驚去為歸船  
霜姿不待他人愛  
照影滄波亦自憐

張弋

楚州

落帆停鼓鸛湖頭  
兩度因循到楚州  
柳下人家常識面  
笑求新句寫妝樓

山行

偶作山行只杖藜  
歸逢寒食下山時  
與僧並坐倚紅樹  
忽有鶴來棲樹枝

趙汝錡

夢回

春意已深寒未了  
夢回斗帳房櫳悄  
五更五點殘月消



山鳥一聲先破曉

倚闌

倚闌有恨無人說  
暮角吹梅寒聲咽  
急風卷雨過鴻驚  
吐下蘆花一枝雪

劉學箕

九月十八日夜夢賞春某氏園池賦春詞二首

題柱 錄一首

樓下酴醾壓架香  
翠圈帷幄覆池塘  
桃花浪暖魚成陣

人倚雕闌到夕陽

溪橋晚步

一帶清溪淺漾沙  
松橋橫渡野人家  
平林盡日霜風勁  
楓葉翻丹似落花

妙湛寺

山逕盤紆露石根  
一溪流水兩山雲  
齋餘緩步青松下  
輸與蕭閒老惠勤

遊九曲

三十六峰高插天來遊誰不慕真仙  
幔亭舊事隨流水空自溪頭喚釣船

淨口絕句

修修野竹碧琅玕亂石懸崖劒戟攢  
貪看野禽穿綠樹不知船已過前灘

葉茵

野望

白水沿堤護綠苗鷄鳴犬卧柳邊橋  
數家雖不成邨落

一夢何曾到市朝

歸途

春來天氣半陰晴  
那更奔馳一月程  
又恐花時成草草  
還家插柳作清明

過溪

筍輿軋軋亂山中  
籬落桃花潑眼紅  
小駐渡頭呼艇子  
一溪淺綠漾晴風

蛩

壁間吟不待秋時吟  
苦中宵動客悲  
勸汝不須催婦織  
家家五月賣新絲

偶成

留得春風趁馬蹄  
日長無事綠楊堤  
菜花籬落誰家酒  
緩轡長歌過小溪

西湖

緗桃深處五陵家  
隄柳陰中百寶車  
多是問桃尋柳去  
近來山下少梅花

漁邨

古柳溪頭枕斷槎橫篙挂網幾漁家得魚去換紅蒸米  
呼子來挑薺菜花

邨居

數舍茅茨簇水涯傍簷一樹早梅花年豐便覺邨居好  
竹裏新添賣酒家

山居

古木環池竹數竿疎籬補菊屋三間白雲不放紅塵入

無怪山人嬾出山

桃花

漫山高下武陵花一片紅酣散晚霞  
要識當時秦晉事  
隔溪修竹兩三家

趙萬年

偶成

一心憂國不憂家  
掠面黃塵帶晚沙  
郵傳不通音信隔  
家人夜夜卜燈花

真德秀

題來青館

客夢成時夜向闌  
幽泉挾雨響潺潺  
清魂便覺超塵世  
何況真棲巖石間

贈夏君宗禹

虎頭自合取侯封  
好為明時立雋功  
却謝玉闕班定遠  
早陪芝嶺夏黃公

杜範



次沈節推送春韻二首

佳人憔悴怯春衣  
日暮高樓酒力微  
流水落花無限恨  
千聲杜宇況催歸

一年春事逐飛蓬  
燕語千愁未許通  
水竹誰家深院落  
捲簾準擬納薰風

偶題

雪外亂山才約畧  
雨中平野更淒迷  
有人支枕蓬窗底  
卧看羣牛渡野溪

洪咨夔

丁東洞

渴烏滴盡三更雨  
鐵鳳敲寒六月風  
湯餅困來茶未熟  
為師搖夢作丁東

省中

禁門深鎖寂無譁  
濃墨淋漓兩相麻  
唱徹五更天未曉  
一池月浸紫薇花

吳淵

冬雨

坐來雜霰灑隆冬  
痛飲那禁感發風  
却憶西樞承旨日  
冒寒猶立大明宮

陳埧

釣臺第十九泉

十年不泛釣臺船  
夢想高風日月邊  
今日偶來無住著  
再嘗灘下鬻茶泉

沈說

紙衾三首

碎搗霜藤月下砧  
清泉瀉出簞紋勻  
老翁採藥歸來晚  
剪得山南半段雲

繭面新乾帶露揉  
春回斗帳伴吟愁  
殘年已辦蒙頭過  
風雪從教打戍樓

一幅新裁碧澗冰  
野人留客宿雲層  
山房恰好松醪熟  
夜半無眠話葛藤

安石嶺

茅屋鷄聲勘夜分杖藜挑月帶餘醺不知身在孤峰頂  
回首人家盡白雲

春詞

水漲寒溝柳又陰小窗風度一聲禽若將離緒繫春事  
片片飛花是客心

秋詞

雨放涼颼晚復晴小窗人亦共秋清月華網在蛛絲上  
錯認疎簾挂水晶

閨詞二首

密幄香燒錦瑟橫，佳人半醉覺寒輕。  
忽思塞下新翻曲，彈作黃蘆孤雁聲。

冬事侵尋渾未知，隔鄰聽得理寒衣。  
驚心步出庭西曲，日影斜斜木葉飛。

徐鹿卿

鬱孤洞天

夢跨長虹海上遊，寒生肌骨一壺秋。  
好風吹得詩魂醒，

自寄雲間翠玉樓

戴復古

晚春

池塘渴雨蛙聲少  
庭院無人燕語長  
午枕不成春草夢  
落花風靜煮茶香

次韻郭子秀曉行

脫葉園林帶曉鴉  
馬蹄步步踏霜華  
山邊水際頻凝顧  
怕有寒梅昨夜花

山村

萬竹梢頭雲氣生  
西風吹雨又催晴  
題詩未了下山去  
一路吟聲雜水聲

客中秋晚

榴花纔放客辭家  
客裏因循見菊花  
獨坐西樓對風雨  
天寒猶自著輕紗

都中冬日

脫却鷄裘付酒家  
忍貧圖得醉京華  
一冬天氣如春暖



昨日街頭賣杏花

次韻盧申之正字野興

芋圃蔬畦接井渚  
茆簷四面槿籬圍  
門前盡日無人過  
牛渡橫塘野鴨飛

題黃州謝深道國正山菴

就荒山竹重抽筍  
新種池荷晚著花  
意象全然似邨落  
又添茅屋兩三家

題鄭子壽野趣

菜花園圃槿花籬麥滿前坡水滿池  
野老橫竿聞鴨過  
牧兒攜笛倚牛吹

湘西寺觀瀾軒

東岸樓臺西岸山  
瀟湘一片在中間  
紅塵不到煙波上  
僧與白雲相共閒

鄂渚解纜

日日言歸不得歸  
今朝真箇是歸期  
西樓煙水南樓月  
別後何人更有詩

巾子山翠微閣

雙峰直上與天參  
僧共白雲棲一菴  
今古詩人吟不盡  
好山無數在江南

無題

憶聞春燕語雕梁  
又聽秋鴻叫斷腸  
一縷沈煙飛不過  
兩樓相對立斜陽

林伯仁話別

別酒三杯醉不知  
梅花嶺外故人稀  
片心暗逐白雲去

日日向君行處飛

釣臺

萬事無心一釣竿  
三公不換此江山  
平生誤識劉文叔  
惹起虛名滿世間

戴昺

效宮詞體

楊柳千絲堆怨緒  
丁香百結鎖愁腸  
小桃先得東皇寵  
莫妬春風過海棠

竹林避暑

自抱桃笙過竹林濃陰一片值千金  
清眠盡晚無人喚  
時有風鳴石上琴

題項宜父方巖山別業

綠蘿翳翳結高林煙吐霞吞一徑深  
半夜松涼鶴先睡  
滿山明月自橫琴

晚菰早韭各隨時霜薤青青間露葵  
甘脆日堪供小摘  
不須更覓養神芝

天台道上早行

復輿軋軋過清溪溪上梅花壓水低月影漸收天半曉  
兩山相對竹雞啼

歸途過銅官山

山逕崎嶇落葉黃青松疎處漏斜陽鳴禽無數聲相應  
一陣微風野菊香

嚴羽

送友人之楚州

黯黯離筵夕照收江城羌笛起邊愁念君此去三千里  
何處關山是楚州

聞笛

江上誰家吹笛聲月明霜白不堪聽孤舟萬里瀟湘客  
一夜歸心滿洞庭

吳中送客歸豫章

川程極目渺空波送爾歸舟奈別何南國音書須早寄  
江湖春雁已無多

臨池

乍涼池館雨初收  
菱角蓮房共趁秋  
獨恨碧波渾占却  
更無剩水浴沙鷗

酬故人見贈

湘江南去少人行  
瘴雨蠻煙白草生  
誰念梁園舊詞客  
枕榔樹下獨聞鶯

江上送客

留君夜飲北風寒  
且折梅花耐醉歡  
明日桐廬潮去遠



孤帆天際若為看

秋日

西風催我轉牙牀坐落秋山午夢涼  
蟬老樹深音響別  
滿天風雨帶斜陽

燕

巢破春雛半不存銜泥空傍主人門  
一生巧計輸黃雀  
飲啄官倉長子孫

臨川送周月船入京

別時把酒已魂銷  
別後音書更閒寥  
一片離心寄春水  
隨君船入浙江潮

嚴粲

秋入

秋入蘋風白浪生  
癡雲未放楚天晴  
青山湖外知何處  
中有斜陽一段明

陽闌圖

人人腸斷渭城歌  
誰獨持竿面碧波  
可是無情如木石

祇因此地別離多

見梅

絕憐生意上寒枝  
幾處巡簷錯恨遲  
數點疎花人未見  
窗間早被月明知

薦福寺

即戴叔倫故宅  
今號戴公堤

石逕秋痕苔蘚深  
誰將清氣潤修林  
戴公堤上古時月  
幾度良宵照苦吟

宿石潭寺寄黃炳

昨夜湖心共泊船一天星露宿寒煙朝來極目無洲渚  
知採蘋花何處邊

紀夢

煙島空濛一鶴飛天風滿袖自吟詩覺來猶似非人世  
花影闌干月上時

池陽道中

脫葉舞風過別岸濕雲含雨上晴天修途喜借晚涼得  
幽鳥一聲生翠煙

過江東

落花時節過江東  
濃綠山頭間小紅  
野店日長春寂寂  
柳陰搖颺酒旗風

月

只道今宵月出遲  
雲間不覺上多時  
夜深花影如清晝  
何處山頭一笛吹

二水聞角

少日鄉間不解愁  
閒聽畫角起譙樓  
西風依舊闌干月

獨自瀟湘萬里秋

子陵灘

一榻從容話歲寒  
相忘共作布衣看  
雲臺諸子成何事  
萬古清風一釣竿

汎湖

四邊天共水漫漫  
身在鴻濛縹緲間  
忽見浮空青一抹  
舟中人說是湖山

李昂英

羅浮梁彌仙遊爛柯山贈以曲筇方笠

葛坡龍竹東坡笠合伴山人到洞天  
柯爛想應留斧在憑君試問石橋仙

雨行梅關

濃嵐四合凍雲癡水墨連屏鬬崛奇  
衝雨此行風景別滿山翠滴水簾垂

羅浮桃源洞

靈符鎖盡穴中蛇深入千巖處士家  
洞戶隔雲呼不應

時時流水出桃花

夜夢漁父求詩覺能記其全書贈梁彌仙

酒沽無盡春無限一葉江湖萬里天  
明月滿蓬風荻響醉眠正在白鷗邊

姚鏞

寓雪川

王戴溪頭小隱仙漁翁引上雪溪船  
幾回倦釣思歸去又為蘋花住一年



題畫壁

兩山灌木帶晴鴉  
泯泯春流漾浦沙  
隔岸小舟呼不應  
碧桃花外是誰家

宿護國寺觀晦翁先生題名

滿樹櫻花滿徑松  
解鞍纔是暝樓鐘  
上方月白山雲靜  
看見東南一兩峰

看了題名看跋文  
自憐不及晦翁門  
野僧惜打殘碑賣  
時共山猿洗墨痕

方岳

禱晴福善

夜落簷花未肯晴  
燈寒等不到天明  
自憐短髮垂垂老  
一滴秋霖白一莖

立春

冰絲玉縷簇青紅  
已逗花梢一信風  
夢到謝池新雪盡  
暖煙含雨綠蔥蔥

綵燕雙簪翡翠翹  
巧裁銀勝試春韶  
東風已到闌干北

看見嬌黃上柳條

湖上

綠波如畫雨初晴  
一岸煙蕪極望平  
日暮落花風欲定  
小樓絃管壓新聲

連天芳草晚萋萋  
蹀躞花邊馬不嘶  
蜂蝶已歸絃管靜  
猶聞人語畫橋西

立春謝司法有詩次韻

一夜接雲作雪飛  
池塘已自綠生肥  
憑君檢校闌干北

柳上新青歸未歸

春思

楊柳生寒莫上樓  
夕陽芳草泥人愁  
情知社近迎新燕  
盡捲湘簾不下鉤

杜鵑花落石闌干  
新染晴波綠遶灣  
小立吟詩風滿袖  
一雙睡鴨占春閒

清明日舟次吳門

蓬牕恰受夕陽明  
楊柳梨花半月程  
老去不知寒食近

一篙煙水載春行

夏夜

河漢微明星乍稀  
碧蓮香濕襲人衣  
夜涼如水琉璃滑  
自起開牕放月歸

暑中雜興

是非不到野溪邊  
只就梧桐聽雨眠  
睡熟不知溪水長  
鷺鷥飛上釣魚船

龜巢夜宴

落日鴛鴦睡淺坡  
荷花初醒水微波  
玉簫吹斷晴雲濕  
最覺池寬得月多

早春山中

空濛山翠濕烏紗  
逗密穿深一徑斜  
誰畫秋厓滿頭雪  
石壇倚竹看梅花

雨宿

雨宿疎篷不耐闌  
蘋花菰葉老江干  
鷺飛欲下忽驚起  
秋水新添一寸寒

次韻陳帳管秋思

秋風吹裂舊荷衣  
自讀離騷倚落暉  
已覺蘆花洲渚冷  
水天歸雁著行飛

九日道中淒然憶潘邠老之句

滿城風雨近重陽  
城腳誰家菊自黃  
又是江南離別處  
煙寒吹雁不成行

田頭

秧田多種八月白  
草樹初開九里香  
但得有牛橫短笛

一蓑春雨自農桑

聞角

城角吹霜月欲斜  
天寒無奈客思家  
不知野菊滄江上  
開到梅梢第幾花

即事

荒煙疎樹野人家  
竹外尋詩一逕斜  
山鳥亦知人意思  
忽翻殘雪啄梅花

獨立



茅茨煙樹水溶溶  
籬落人家帶晚春  
獨立西風無一事  
自撐短艇看芙蓉

潘枋

恭謝駕回丞相以下皆簪花

輦路安排看駕回  
千官花壓帽簷垂  
君王不輟憂勤念  
玉貌還如未插時

鄭震

荆南別賈制書東歸

來時秋雨滿江樓  
歸日春風度客舟  
回首荆南天一角  
月明吹笛下揚州

晚春即事

輕寒時節牡丹開  
葉底青青又見梅  
門外數枝楊柳薄  
一春鶯燕不曾來

荆江口望見君山

荆江江口望漫漫  
一白無邊夕照寒  
只是青雲浮水上  
教人錯認作山看

林希逸

黃源嶺半見梅作

古嶺森森立萬松一株寒玉笑春風  
恰如釣艇桐江客畫入雲臺劍珮中

馬和之覓句圖

先生隱几奴煨火斜插疎枝破瓦尊  
鶴夢未回更幾轉吟時應是月黃昏

即圃偶題

曲階倚杖行疎影柳花度竹黏衣領臺根三兩落殘梅  
時見幽禽窺野井

周弼

落梅

玉樹分明照夕流粉痕翻為碧苔留三更枝上玲瓏雨  
亂滴寒香一夜愁

回山僧書就題書尾

憶昔同遊題落葉寺前枯樹鶴巢邊不知今度苔枝上

多少秋蟲已化蟬

秋夜

山門半掩浮雲闕  
古道入稀芳草歇  
夜深零露滴秋香  
幽人獨步青蘿月

野廟

野廟荒蕪倒掩扉  
寂寥香火客來稀  
年年歸燕相看覩  
空滴春泥損畫衣

女墳湖

石龜無語對東風  
海鶴曾迷曉市中  
三十六鱗朝夜月  
玉釵人在水晶宮

吳門送同行者之毗陵

布帆何處定逢春  
身是歸人又送君  
明日隔城回首望  
冷花寒葉滿秋雲

西湖初夏

花飛春減綠陰成  
不住風光繞禁城  
山寺晚晴蟬欲噪  
柳林猶轉數聲鶯

客樓

水國清秋潮半生  
越王臺殿鎖荒城  
西樓一夜思歸客  
斜倚朱闌獨聽笙

胥門

蘆葦蕭蕭生晚潮  
伍員何地更吹簫  
夕陽自逐寒鴉去  
萬片宮花共寂寥

錢時

睡起

雨浥蒲風晚更涼數花蒼蘂淨生香高眠深穩清無夢  
儘覺人間白晝長

錢默

秋思

坐擁遺經百尺樓湘簾高捲不勝秋半窗涼月三更夢  
一枕淒風萬斛愁

錢槲

溪上



秋老蘆花冉冉飛  
曉天寒氣襲人衣  
輕撓掉入鷗羣去  
釣得鱸魚帶雨歸

錢端琮

菊

雨隨秋色入重陽  
籬下黃花未放香  
莫怨枝頭開較晚  
晚開到底耐風霜

許棐

夜泊長河

黃帽貪程夜泊遲  
市樓燈火歇多時  
滿懷風月無分付  
却借漁翁短笛吹

秋江漁父

小舟輕似一鷗飛  
戀月隨風慵不歸  
困卧蘆花深雪裏  
夜寒添蓋舊蓑衣

雪曉

臘雪連宵接曉飛  
錦衾公子未曾知  
起來攜杖敲梅樹  
扶得輕盈壓損枝

春晚

推過詩編把酒斟  
挽春幾句讓吟鶯  
門前却喜無人埽  
積得殘花一寸深

秋齋即事

桂香吹過中秋了  
菊傍重陽未肯開  
幾日銅瓶無可浸  
賺他飢蝶入窗來

郭南湖見訪却適有出一絕為謝

一蓬風雨偶歸遲  
見說君來扣我扉  
童子困眠梅樹下

不曾放過鶴雙飛

落梅

紅杏枝枝嬌似染  
綠楊處處密成圍  
苦無顏色相追逐  
自趁東風作雪飛

施樞

月夜憶梅花

夜深寒月照窗紗  
忽憶林逋處士家  
鷗鷺正眠煙樹冷  
不知誰可伴梅花

題桃源圖

山中與世不相關  
雞犬桑麻盡日間  
傍水桃花春爛漫  
誤傳消息到人間

立春

彩勝飄春上髻蓬  
倚闌一笑問東風  
青青柳眼梅花雨  
纔染陽和便不同

橫瀆岸邊梅花方開

霜染梅花倚道傍  
亭亭野水弄幽芳  
東風似賞孤高意

未許飄零一片香

分賦楊花

纖腰睡起芳情足誰道春風浪拘束日暮天涯細草多  
輕風誤入闌干曲

雨中用雪坡韻

無計酬春得有詩倚闌終日候晴暉東風漸屬新桃李  
簾幕深深燕子飛

贈湖邊柳

亂撒鶯黃拂曉晴天涯多少故人情遊船空逐輕陰轉  
半屬春風半屬鶯

聞雁

飛盡沙田到水鄉年年來往為誰忙只貪夜月蘆花宿  
不是將身傍稻粱

泛月夜歸

短艇衝寒泛淺沙滿溪明月浸蘆花忽驚遠岸燈光發  
籬落蕭疎一兩家

小樓獨坐用菊潭壁間韻

簾捲疎風入小樓  
夕陽銜雁欲西流  
無人細說吟邊事  
獨有黃花共晚秋

分韻春字

柳外鶯聲錯喚人  
小樓吟苦不知春  
落花飛過秋千去  
一片閒情客裏身

綠字韻

曉帳香消閒畫燭  
夢回山斷屏風曲  
輕煙細雨客多情



南浦草隨新漲綠

閨思

簾底臨鸞惜歲髣雲慵掠寶釵斜落梅香斷無消息  
一樹春風屬杏花

春夜賦小字

岸桐花開春欲老目斷斜陽芳信杳東風不管客情多  
杜鵑啼月青山小

小樓對月

京國誰曾念  
旅遊閒情芳思兩悠悠  
却因今夜闌干月  
引得春風上小樓

晚望

芳草迢迢客路長  
柳邊吹絮燕泥香  
桐花坼盡春歸去  
猶倚危闌問夕陽

夜泊黃灣

移近黃灣泊短篷  
野雲隨地一溪風  
渚香吹散荷花雨  
幾點流螢出葦叢

西河柳

一把輕絲拂地垂  
柔梢淺淺抹燕脂  
絮花吹盡枝方長  
却恨東風未得知

初泊世綵

不問蕭條傳舍空  
來敲空枕聽西風  
一庭明月無人管  
秋在梧桐落葉中

早起

簷前鳴玉響  
丁東清夢初迴  
鶴帳中早起  
井梧飄一葉

方知昨夜是秋風

御選宋詩卷七十二

謹案第二十頁後八行忍貧圖得醉京華刊本貧

作寒據石屏集改





總校官庶吉士臣侍朝

校對官檢討臣蕭九成

謄錄舉人臣張昱